

30. september 2021

UKA2021/24

**Uunga siunnersuut: Inissianik attartortitsisarneq pillugu Inatsisartut peqqussutaata allanngortinneqarnera pillugu Inatsisartut inatsisaat nr. xx, xx. xxx 2021-meersoq (Attartornermi akiligassap akilerneqarfissaa, inissianik attartortittakkanik oqoqalersimasunik nalunaarsuineq kiisalu suliffimmut atatillugu inissianik oqoqarsimasunik innersuunneqartunik itigartitsisinnaatitaaneq)**

(Ineqarnermut, Attaveqaasersuutinut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Naalakkersuisut inissianik attartortitsisarneq pillugu inatsisissatut siunnersuutaannut qujalluta Siumumiit imaattumik oqaaseqassaagut.

Naalakkersuisut siunnersuutaat ilaatigut attartornermi akiligassap akilerneqarfissaata allanngortinneranik, inissiat attartortittakkat oqoqalersimanerannik nalunaarsuisarnernik kiisalu suliffimmut atatillugu inissianik oqoqalersimasunik innersuunneqartunik itigartitsisinnaatitaatitaanerup atuutsinneqalernissaanik imaqarpoq.

Siumumiit tullerriaarneri maliinnarlugit oqaaseqassaagut.

Inissianik attartornermi akiligassap akilerneqarfissaata allanngortinnera inatsisartut ataatsimiinneranni ukioq 2016-imi akueralugu isummerfigereernikuuarput, taamaattumik pissusissamisoorpoq siunnersuutip akuerinissaa. Taamaattorli qulakkeerusupparput Ataatsimiitsitaliap siunnersuummik suliaqarsimasup 14-ikkaartumik aningaasarsisartunik ernummateqarnerata qanoq uani saqqummiussami nalilersorneqarsimanera paasissallugu.

Inissianik oqoqartunik nalunaarsuisarnermut aammalu suliffimmut atatillugu inissiamik attartugassamik innersuunneqartumik oqoqartoqartoq paasigaanni itigartitsisinnaanerup periarfissaalernissaanuttaaq Siumumiit akuersinikuugatta oqaatigissavara. Taamaattumik timitalerniarlugu inatsisitigut nalimmassaaneq matumuuna akuerigatsigu oqaatigissavara.



Taama oqaaseqarluta Inatsisissatut siunnersuut Sanaartornermut ataatsimiitsitaliami sukumiisumik, siunnersuutit tunngavigineqartut anguniagaannut naleqqunnersoq misissoqqissaarneqassasoq Siumumiit inassutigarpuit.

Nikkulaat Jeremiassen, Siumut